



KEMENTERIAN PEMBANGUNAN WANITA,  
KELUARGA DAN MASYARAKAT

## KENYATAAN MEDIA

### INISIATIF OUTREACH PICK : KPWKM WUJUDKAN SUKARELAWAN MEMBANTU PROSES PEMBERIAN VAKSIN

Hari ini saya telah membuat tinjauan dan pemantauan pelaksanaan vaksinasi warga emas di Pusat Jagaan Rumah Kebajikan Calvaryland, Sungai Pelek, Sepang yang merupakan salah satu program *outreach* oleh Kerajaan melalui kaedah Pusat Pemberian Vaksin (PPV) Bergerak. Seramai 31 orang penghuni warga emas dan 15 orang kakitangan di pusat jagaan tersebut telah diberikan vaksin COVID-19 melalui PPV Bergerak pada hari ini.

Sebagai Menteri Pembangunan Wanita, Keluarga dan Masyarakat yang bertanggungjawab ke atas kebajikan dan kesejahteraan warga emas di negara ini, saya berterima kasih dan menyambut baik akan keprihatinan dan inisiatif yang telah diambil oleh Kementerian Kesihatan Malaysia (KKM), Kementerian Sains, Teknologi dan Inovasi (MOSTI) dan Jawatankuasa Khas Jaminan Akses Bekalan Vaksin COVID-19 (JKJAV) yang **mengutamakan pemberian vaksin kepada warga emas berusia 60 tahun ke atas melalui Program Imunisasi COVID-19 Kebangsaan (PICK).**

Kementerian Pembangunan Wanita, Keluarga dan Masyarakat (KPWKM) akan menggerakkan sukarelawan agensi-agensi di bawahnya untuk membantu proses pemberian vaksin kepada kumpulan sasar KPWKM, mempromosikan pendaftaran dan penyebaran maklumat sahih mengenai kebaikan vaksin COVID-19 serta membantu kumpulan sasar yang amat memerlukan bantuan fizikal seperti OKU dan warga emas terlantar.

Antara sukarelawan yang akan dilibatkan adalah seperti berikut:

- i. Sukarelawan Jabatan Kebajikan Masyarakat (JKM);**
- ii. Sukarelawan Khidmat Bantu Di Rumah, Jabatan Kebajikan Masyarakat (JKM);**
- iii. Skuad Prihatin Negara;**
- iv. Skuad Waja, Jabatan Pembangunan Wanita (JPW); dan**
- v. Sukarelawan Yayasan Kebajikan Negara (YKN)**

**Anggaran jumlah keseluruhan sukarelawan adalah seramai 15,000 orang.**

Saya berharap masyarakat turut mengambil berat dengan menjadi “mata dan telinga” bagi pihak Kerajaan, dan terus memupuk sikap ambil peduli terhadap kesejahteraan dan kebajikan antara satu sama lain. Laporkanlah kepada saluran yang sesuai sekiranya terdapat kes-kes yang memerlukan bantuan segera seperti warga emas atau OKU yang berseorangan/terlantar.

**Talian Kasih 15999 dan Talian Whatsapp 019-26 15999 sentiasa bersedia membantu anda semua setiap masa, 24 jam sehari.**

Sama-samalah kita memainkan peranan penting dalam memastikan masyarakat mendapat maklumat yang sahih dan tepat berkaitan PICK dan kebaikan vaksin serta menyampaikannya kepada mereka yang berisiko tinggi khususnya warga emas dan OKU. Peranan ini perlu dimainkan oleh semua pihak dalam usaha untuk menggalakkan pendaftaran penerimaan vaksin melalui saluran-saluran yang disediakan seperti berikut:

- i. Aplikasi MySejahtera (ahli keluarga lain turut boleh mendaftarkan warga emas melalui MySejahtera);**

- ii. Panggilan telefon ke Talian Program Vaksinasi COVID-19 Kebangsaan 1-800-888-828;
- iii. Laman sesawang Jawatan Kuasa Khas Jaminan Akses Bekalan Vaksin COVID-19 (JKJAV) di pautan <http://www.VaksinCovid.gov.my>; atau
- iv. Pendaftaran di klinik/hospital kerajaan.

**Lindung Diri, Lindung Semua.**

**YB Datuk Seri Rina Mohd Harun  
Menteri Pembangunan Wanita, Keluarga dan Masyarakat.  
10 Jun 2021**